

## UVODNA RIJEČ

Poštovani čitaoci,

Objavljivanje šesnaestog broja Zbornika radova Islamskog pedagoškog fakulteta u Zenici događa se u godini u kojoj Islamski pedagoški fakultet Univerziteta u Zenici obilježava 25 godina svog uspješnog djelovanja.

Značajno za Fakultet jeste i to što je u 2018. godini Ministarstvo obrazovanja, nauke, kulture i sporta Zeničko-dobojskog kantona, nakon zakonom predviđene procedure, donijelo rješenja o ispunjenosti uvjeta za početak rada prvog ciklusa studija na novoosnovanom Odsjeku za inkulzivnu edukaciju i ispunjenosti uvjeta za početak rada Doktorskog studija odgojnih znanosti na Odsjeku za socijalnu pedagogiju i Odsjeku za predškolski odgoj i obrazovanje. Na oba ciklusa bit će upisana prva generacija studenata u ak. 2019/20. godini.

Radovi u ovom broju Zbornika radova su strukturirani u šest poglavlja: Vjerske znanosti, Religijska pedagogija, Socijalna istraživanja, Islamska misao i civilizacija, Jezik i književnost i Prikazi knjiga.

U poglavlju Vjerske znanosti prezentirana su četiri rada. Muamer Neimarlija govori o recepciji kur'anskih i hadiskih poticaja za razvoj znanosti u klasičnom i modernom muslimanskom svijetu. Šukrija Ramić nudi deskripciju nužnog značenja zakonodavnog teksta (iqtidāun-naṣṣ) u Ḥanefijskoj pravnoj školi. Mensur Valjevac i Mina Valjevac govore o tesavvufu kao metodici duhovnog odgoja, a Safet Husejnović o utjecaju kira'eta na propise o namazu.

Poglavlje Religijska pedagogija sadrži radove studenata doktorskog studija na Odsjeku za islamsku vjeronauku. Hasudin Atanović i Esad Memić istraživački propituju osobnosti implementacije kooperativnog učenja u osnovnoškolskoj religijskoj edukaciji. Safet Beganović i Derviš Varešlija nude deskripciju motivacijskih faktora u mektebskoj nastavi. Esad Memić i Hasudin Atanović uradili su komparativnu analizu tradicionalnog i interaktivnog učenja u nastavi islamske vjeronauke, a Derviš Varešlija i Safet Beganović komparativnu analizu kvaliteta liderskog rukovođenja kod imama i vjeroučitelja.

U poglavlju socijalna istraživanja prezentirano je šest znanstvenoistraživačkih rezultata. Anela Hasanagić i Nina Bosankić uradile su validaciju Skale akademske motivacije na učenicima srednje škole. Elma Begagić, Inela Šehić Torlaković i Almira Isić Imamović govore o funkciji psihosocijalnog savjetovanja u tretmanu osoba oboljelih od shizofrenije iz perspektive savjetovatelja. Izet Pehlić, Jakub Hasić i Suad Orlić nude socijalnopedagošku deskripciju pripisivanja uzročnosti vlastitog delinkventnog ponašanja maloljetnika. Almira Isić Imamović i Adis Elias Fejzić istraživali su psihološku ulogu i značaj likovnog kreativnog izražavanja u starijoj životnoj dobi. Amila Kadić i Mersiha Jusić istraživale su sociodemografske i druge korelate terminalnih vrijednosti studenata socijalne pedagogije, a Alma Nezirović povezanost bazično-motoričkih sposobnosti i deformiteta kod studentske populacije.

U poglavlje Islamska misao i civilizacija uvršten je samo jedan rad. Elvir Duranović piše o dovištu Dobre vode kod Foče.

Poglavlje Jezik i književnost sastoji se iz pet radova. Zehra Alispahić piše o semantičkom polju glagola kretanja u službi promoviranja kur'anskih intencija. Aida Tarabar i Senaid Fejzić istraživali su efikasnost kompjuterski podržane nastave engleskog jezika na unapređenje jezičkih kompetencija učenika srednjih škola. Mersad Dervić i Nizama Spahić uradili su evaluaciju pet ključnih aspekata učenja jezika – kritički osvrt na Krashenove teorije. Amrudin Hajrić piše o ekstralingvističkim faktorima jezičkog raslojavanja na primjeru arapskog jezika, a Ikbal Smajlović motivu sna u Andrićevim pripovijetkama.

Na kraju Zbornika radova Adil Makić nudi prikaz knjige „Metodologija tumačenja Kur'ana u hanefijskom mezhebu“ dr. Safveta Halilovića.

Vjerujemo da će čitaoci u ovom broju Zbornika radova steći nove uvide, razviti drugačije perspektive ili dobiti podsticaj za temeljitije i dugotrajnije istraživanje nekog fenomena ili pojave.

Iskreno zahvaljujemo svim autorima na doprinosu u kontinuitetu izlaska Zbornika, a recenzentima, lektorima, članovima Uređivačkog kolegija i Savjetodavnog odbora veliko hvala na učešću u osnaženju kvaliteta i postignutih standarda.

Zenica, 3. decembar 2018.

Glavni urednik  
Prof. dr. sc. Izet Pehlić